



**LEKSYON 3
PAGPILI UG
KAPIKAS**

Matun-an Nimo Niining Leksyona

Ang Pagkaimportante sa Pagpili Ug Kapikas

Ang Pagiya sa Dios

Ang tinguha sa Dios nga ikaw pagiyakan
Unsaon sa Dios pagiya kanimo

Ang Sumbanan sa Biblia

Pakigminyo sa usa ka Kristohanon
Paneguraha nga kamo nagakauyon gayud

Kalidad sa Imong Pagapilion

Ang pagkaimportante sa kalidad
Kinaiya
Batasan
Panagkasamag interes ug personalidad
Maayong panglawas

Kahigayonan

Paghigugmaay ug Pag-uyonay

Kasegurohan sa Kabubut-on sa Dios

ANG PAGKAIMPORTANTE SA PAGPILI UG KAPIKAS

Importante gayud kaayo ang pagpili ug kapikas sa tibuok mo nga kinabuhi. Ngano? Tungod sa daghanan nga mga katarungan.

Una, importante kini tungod sa inpluwensa nga mahatag sa imong kapikas sa imong kinabuhi. Ang tawo nga imong pagaminyoon makatabang sa pag-umol sa imong kinabuhi. Siya makapaliko sa dagan sa imong kinabuhi ngadto sa pagkamatarung ug langit o ngadto sa sala ug impierno. Ang adlaw-adlaw ninyong panag-uban makatabang kanimo pagkab-ut sa walay kinutubang kalipay o magadaldal kanimo pahilayo sa Dios nga mao lamang ang tuburan sa matuod nga kalipay. Ang pagpili ug imong kauban sa kinabuhi makapasayon o makapalisud kanimo sa paghigugma, pag-alagad ug pagsugot sa Dios.

Ikaduha, importante ang pagpili tungod kay kini hangtud sa tibuok mo nga kinabuhi. Ang Kristohanon dili magminyo nga naghunahuna nga kon dili sila magka-uyon magbulag lang dayon. Kon ikaw adunay biseklita nga dili na nimo hiayonan, imo kining ibaligya ug mopalit ug lain, apan kini dili mahimo sa asawa ug bana. Ang Biblia nagtudlo nga ang kaminyoon hangtud sa tibuok mo nga kinabuhi.

Roma 7:2. Tungod niini, ang babayeng minyo gipasakup sa kasugoan ngadto sa iyang bana samtang magapabiling buhi ang bana. Apan kon mamatay ang iyang bana, siya mahigawas na gikan sa kasugoan mahitungod sa bana.

Marcos 10:9. Busa ang sa Dios ginahiusa, sa tawo ayaw ipabulag sila.

Wala gayuy butang nga gitawag nga sulay-sulay sa kaminyoon sa mga Kristohanon, ang buot ipasabut nga managtipon una kon magkauyon ba unya mao pa magminyo. Sumala sa sumbanan sa Dios kini dautan.

Tungod kay ang imong pagpili ug kauban sa kinabuhi importante, dili gayud kini dalidalion. Salamat, nga ang Pulong sa Dios nagahatag kanato ug mga prinsipyo nga pagasundon sa atong paghimo ug pagpili aron ang atong kaminyoon magmalipayon.

Buhata Kini

1. Isulat ang duha ka katarungan ngano nga importante ang pagpili ug kapikas sa kinabuhi.

2. Asa man nimo makita ang mga prinsipyo nga pagasundon sa pagpili ug kauban sa kinabuhi?

ANG PAGIYA SA DIOS

Ang Tinguha sa Dios nga ikaw pagiyahan

Kon ikaw anak sa Dios, maseguro nimo nga ang imong langitnong Amahan gusto nga ikaw makabaton ug kauban nga labing maayo alang kanimo.

Gibuhat sa Dios si Eva ingon nga hingpit nga kauban nga makatagbo sa gikinahanglan ni Adam. Nasayud usab ang Dios kanimo ug sa imong gikinahanglan. Nasayud Siya kanimo labaw pa gani sa imong pagkasayud sa imong kaugalingon ug nasayud usab Siya kon kinsa ang tawo nga labing angay kanimo. Nahigugma Siya kanimo ug nagtinguha Siya nga motabang kanimo.

Busa sa dili pa ikaw mopili, seghuroha sa pagpanyayo sa Dios nga ikaw Iyang giyahan sa imong pagpili ug kapikas. Pagampo mahitungod niini ug pagmatinumanon sa pagsunod Kaniya.

Santiago 1:5. Ug kon aduna man kaninyoy naku-
langan ug kaalam papangayoa siya sa Dios. . . ug
kini igahatag kaniya.

Buhata Kini

3. Unsa may imong buhaton sa dili ka pa mopili ug kapikas sa kinabuhi?

Unsaon sa Dios pagiya kanimo

Unsaon sa Dios pagpahibalo sa usa ka tawo kon kinsa ang iyang minyoan? Kasagaran ang Dios magagiya sa iyang mga anak pinaagi sa panagkauyon niining lima ka nagkalain-laing paagi:

- * Pinaagi sa Biblia
- * Pinaagi sa hustong paggamit sa kaugalingong pangisip.
- * Pinaagi sa kahigayonan
- * Pinaagi sa matuod nga paghigugmaay ug pag-u-yonay
- * Pinaagi sa kasegurohan sa kabubut-on sa Dios.

Ang usa ka Kristohanon kinahanglan nga magapangita sa pagiya sa Dios niining mga paagiha. Kinsa kadtong magahimo ug pagpili sa ilang ikauban sa kinabuhi kinahanglang magseguro nga kini sumala sa sumbanan nga makita sa Biblia. Ang personalidad sa babaye, ug lalake kinahanglang magkatakdo o magkauyon gayud alang sa usag usa. Ang kahigayonan kinahanglan nga moduyog usab kanila sa pagtabang aron mamahimo ang kaminyoon. Aduna usab matuod nga pagdawat sa usag usa ug kasegurohan sa kabubut-on sa Dios.

Buhata Kini

4. Sag-uloha ang lima ka paagi diin ang Dios makapahibalo sa tawo kinsa ang iyang minyoan.

ANG SUMBANAN SA BIBLIA

Ang una ug ang labing importante sa mga paagi diin ang Dios magagiya kanimo mao ang Iyang Pulong. Diha sa Biblia ang Dios nagahatag kanimo ug mga sumbanan nga pagasundon.. Imong maseguro nga ang Iyang pagiya dili gayud magkasumpaki sa mga sumbanan nga Iyang gihatag kanimo. Ang duha niining mga sumbanan alang sa mga Kristohanon mao kini:

- * Pagminyo ug usa ka Kristohanon
- * Paneguroha nga kamo nagkauyon gayud

Pagminyo ug usa ka kristohanon

Sila nga nakabaton na ug panimalay sa ilang kaugalingon adunay kaakohan sa sulod sa ilang panimalay bisan ang ilang kapikas dili mga Kristohanon. Apan kon ikaw usa ka Kristohanon ug wala pa maminyo, angay nimong mahibaloan nga ang Dios dili buot nga ikaw magminyo sa usa ka dili magtotoo.

2 Corinto 6:14. Ayaw kamo pagpahiangay sa inyong kaugalingon kauban sa mga dili magtotoo diha sa mao rang usa ka yugo. Kay unsa may kigkomboyahan sa pagkamatarung ug sa pagkadautan? O unsa may pakig-ambitan sa kahayag ug sa kangitngit?

Mabasa nato sa Biblia ang mahitungod sa duha ka batan-on nga nangasayop tungod sa ilang pagpangasawa ug dili magtotoo sa Dios. Sila mao si Samson ug si Solomon. Si Samson nabihag sa usa ka batan-ong babaye nga dili pareho niya ug tinoohan. Ang iyang ginikanan nagapanghimangno kaniya sa pagpangasawa ug babaye nga gikan sa ilang katawhan, apan midumili siya, Ang

iyang unang kaminyoon maoy usa ka dakung kapakyasan bisan gikan pa sa sinugdanan. Apan wala gihapon siya mosunod sa sumbanan sa Dios. Sunod, ang ikaduha niyang asawa mibaligya kaniya ngadto sa iyang kaaway. Si Hari Solomon nga gitawag ug manggialamon nadala pahilayo sa Dios tungod sa dili magtotoo nga mga asawa.

Busa, pagbantay sa imong pagpakighigala. Madugay nimong pakigkuyog sa imong higala makakat-on ikaw sa pag-angay kaniya, busa ayaw kini himoa nga makadala kanimo sa paghigugma sa usa ka dili Kristohanon. Pilia ang imong mga suod nga mga higala diha sa mga Kristohanon. Ayaw tugoti si Satanas nga ikaw masimang gikan sa kabubut-on sa Dios ug madaut ang imong kinabuhi pinaagi sa imong pakigminyo sa usa ka dili magtotoo.

Buhata Kini

5. Nganli ang duha ka batan-on sa Biblia nga nadaut ang ilang kinabuhi tungod sa ilang pakigminyo sa mga babaye nga dili magtotoo.

-
6. Sag-uloha ang 2 Corinto 6:14.

7. Unsa may imong hunahuna mahitungod sa mga Kristohanon nga nakigminyo ug mga dili magtotoo?

.....

.....

.....

Paneguroha nga kamo nagakaayon gayud

Ang pagka Kristohanon sa usa dili igo nga kata-rungan nga siya imong minyoan. Ang Biblia nagatudlo nga dili ikaw makabaton ug malipayong panimalay gawas kon kamo magkaayon sa mga butang.

Amos 3:3. Magakakuyog ba ang duruha gawas kon sila magkaayon?

Ang dili panagkaayon sa relihiyon dili makahimo ug usa ka malipayong panimalay. Ikaw ug ang imong kauban kinahanglan nga magkaayon sa dapit nga inyong pagapuy-an, unsaon ninyo pag-alagad Kaniya, unsang iglesiaha ang inyong tambongan ug unsang relihiyona nga bansayon sa inyong mga anak. Kasagaran ang panag-kalahi sa relihiyosong pagtudlo makapabungkag sa panimalay. Usa ka ilhanan nga dili maayo sa pagsugod ug bag-ong panimalay mao ang panagbulag sa pagsimba.

Walay duha ka tawo nga hingpit ang ilang panagkaayon sa tanang butang; ug kana imo gayung mapaabut. Apan ang bana ug ang asawa kinahanglang magkaayon gayud sa mga butang nga importante.

Ikaw ug siya nga imong gilauman nga minyoan nagkaayon ba bahin sa Diosnong sumbanan alang sa inyong panimalay? unsaon pagtudlo sa mga anak? sa responsibilidad sa bana ug sa asawa? unsaon pagkupot sa inyong salapi? Kon kamo wala magkaayon, pagbantay, kay ikaw nagpaingon sa kagubot.

Kining mga leksyona makatabang kanimo sa pagbaton ug usa ka malipayong panimalay, sa dihang kamong duha magatuon sa pahimangno sa Dios ug magkaayon sa mga sumbanan nga Iyang gihatag kaninyo diha sa Iyang Pulong.

Buhata Kini

8. Sag-uloha ang Amos 3:3.
9. Pag-ampo mahitungod niini ug isulat ang imong kaugalingong tubag. Unsaon man nimo pagkahibalo nga ang usa miuyon ba o wala sa mga butang nga gihisgutan niining bahina?

Imo bang ipasulabi nga ang imo rang hunahuna husto o imo bang timbang-timbangon ang imong hunahuna ug sa hunahuna sa uban aron kamo magka-uyon?

10. Unsa may imong ilhanan nga kining imong pagtuon niining mga leksyona nakatabang nimo ug sa imong umaabut nga kauban sa kinabuhi nga kamo magakauyon gayud sa inyong panimalay?

KALIDAD SA IMONG PAGAPILION

Ang pagkaimportante sa kalidad

Unsa may mga kalidad sa tawo nga gustoan nimong minyoan? Ang ubang mga batan-ong lalaki moingon: “Kinahanglan siya nga guapa, utokan ug educado. Kinahanglan gikan siya sa inila ug adunahan nga pamilya.”

Naay uban niining mga butanga nga kaha angayng panganduyon apan walay usa niini nga makagarantiya sa usa ka malampusong kaminyoon. Sa pagkatinuod, ang usa ka maanyag nga babaye mahimong mapagarbohon sa iyang kaanyag. Mahimong gamiton gani niya ang iyang kaanyag sa pagdani sa ubang mga lalaki bisan minyo na siya.

Ang usa ka babaye nga gikan sa adunahan nga pamilya magdahum nga ang iyang bana nga mao pay pagsugod sa trabaho, maghatag kaniya sa tanan niyang gikinahanglan bisan dili makaabot.

Ang kaanyag, edukasyon ug ang pagkainila mahimong makatabang apan adunay mga kalidad sama sa kinaiya, maayong pamantasan, maayog panglawas ug pagsinabtanay nga mas hinungdanon.

Buhata Kini

11. Pagngalan ug duha ka kalidad nga dili kaayo kinahanglanon nga ang kaminyoon magmalipayon.
-

Kinaiya

Unsang klaseha sa tawo ang gusto mong ikauban sa tibukong mong kinabuhi? Maayo ba o bagulbolan? mahigalaon ba o palaaway? mapailubon ba o dali rang masuko? Maayo ba o mang-“under”? matinabangon ba o pala-sugo? manggihatagon ba o dalo? kasaligan ba o seloso?

Nangita ba ikaw ug usa nga maayog dungog o usa nga kwestionable? matinud-anon o kanunay kang bakakan? kugihan o tapulan?

Ang kinaiya natukod ug nahulma gikan pa sa pagkabata. Ang panimalay sa tawo nga imong higustoan magahatag kanimog mga panghunahuna mahitungod kaniya. Dunay inila na mga pinulongan nga nagingon: “Kon unsay amahan-mao sab ang anak.” “Kon unsa ang inahan mao ‘sab ang anak babaye.’” Kasarangan sa anak mosunod gayud sa panig-ingnan sa iyang ginikanan.

Apan ang grasya sa Dios magatabang sa usa ka Kristohanon nga mausab ang iyang kinaiya bisan pa ang iyang panimalay dili makatabang kaayo sa paghatag kaniya ug maayong pagtudlo. Ug duna usay tawo nga bisan maayo ang ilang panimalay apan dili mosunod sa panig-ingnan nga gihatag kaniya sa iyang ginikanan. Busa, ang panimalay makatabang kanimo sa pagpangita ug maayong kalidad sa usa ka tawo, apan dili nimo isalig ang imong paghukom sa kinaiya sa usa ka tawo diha sa panimalay diin siya gikan.

Buhata Kini

12. Pagbuhat ug talaar: sa mga kinaiya nga imong higustohan sa imong mahimong bana o asawa.

13. Karon susiha ang imong kaugalingon pinaagi sa lista nga imong nasulat. Markahi sila alang sa imong kaugalingon. Butangi ug "maayo" sa mga pulong nga naghulagway kanimo; "luya" sa mga kinaiya nga kinahanglan pang ugmaron.


14. Pag-ampo nga ang Dios magahimo nga maayong kapikas sa makabana o makaasawa kanimo. Unya pag-ampo usab nga ang imong umaabut nga kapikas makabaton sa mga kalidad nga mahisibo kanimo.

Batasan

Ang batasan sa usa ka tawo lisud mausab. Kon dunay batasan ang usa ka tawo nga makasamok nimo, ayaw pagdahum nga ang iyang batasan mausab sa human kamo maminyo. Hinumdumi ang usa ka pinulongan nga "Ayaw minyoi ang usa ka tawo aron sa pag-usab kaniya." Ayaw gayud pagdahum nga makahimo ikaw pag-usab sa kinaiya ug batasan sa imong bana o asawa ngadto sa imong nagustohan.

Ang matuod nga gugma makapahimo sa bana ug asawa sa pagpaningkamot nga maghiuyonay sa usag usa ug kalimtan kadtong mga butang nga dili kaayo importante. Ug sa mga butang importante magtinabangay gayud sila. Apan ayaw pagpakabuta nga magminyo ka lang dayon nga dili maghunahuna kon unsay mga batasan sa imo unyang mahimong kapikas.

Mahigugmaon ba siya sa kalinis o hugawan ba siya? matinahuron o tigpanulti ug sakit? mabinantayon sa iyang pamayhon o tigpasagad? Kanunay ba lamang iyang sulti o maminaw ba siya kon unsay isulti usab sa uban? Modawat ba siyag kaakohan ngadto sa Dios ug sa simbahan nga magmatinud-anon? Giunsa man niya pagtagad ang iyang mga igsoon ug ginikanan?



Buhata Kini

15. Pagbuhat ug talaan sa mga maayong batasan nga gusto nimong makita sa imong mahimong kauban sa kinabuhi.

16. Ilista ang mga batasan nga sa imong hunahuna dili makahatag ug kalipay sa imong kaminyoon.

17. Susiha ang imong kaugalingon sa mga nahisulat sa itaas nga imong gilista ug pag-ampo alang sa imong kaugalingon ug sa imong umaabut nga kapikas.

Panagkasamag interes ug personalidad

Gusto ka bang magpuyo sa tibuok nimong kinabuhi kauban sa usa nga dili interesado o dili mouyon sa mga butang nga labing importante alang kanimo? Ang mga bana ug mga asawa nga interesado sa mao ra nga mga butang may dakung kahigayonan nga ang ilang panimalay magmalipayon.



Usahay ang dili magkasama nga kinaiya maayo kay makatabang man sa usag usa. Pananglitan, ang usa ka tawo nga kanunay lang iya ang sulti malipay kon makakauban ug usa nga hilomon apan maayo maminaw. Ang tawo nga hataas ug panghanduraw nagkinahanglan ug kapikas nga mobuhat sa kinahanglang buhaton.

Apan ang bana ug ang asawa nga adunay kinaiya ug personalidad nga dili gayud magkauyon, malisud gayud alang kanila nga magkakuyog. Kon ang usa ka batan-ong bana taas ug panlantaw ug kugihan, may dakung posibilidad nga dali ra siyang mosuko sa iyang asawa nga hinayan, dugay kasabut ug tapulan.

Si Eva gibuhat ingon nga husto nga katabang ni Adam. Buot usab sa Dios nga magkauyon usab kamo sa imo unyang kauban. Adunay inyong pagkasama aron kamo magkauyon, ug aduna usahay panagkalahi aron kamong duha may ikaamot alang sa pagmugna ug usa ka maayong panimalay.

Buhata Kini

18. Pagbuhat ug lista sa mga buluhaton nga imong higustohan. Ang imong kapikas dili tingali mahiuyon sa uban niini, ug kon siya mosupak gayud niini, makahimo kini kaninyo ug kagubot.

19. Ilista ang mga butang nagustohan nimong pakigsultihan. Gusto ba ang imong umaabot nga kapikas mohisgot niining mga butanga?

Maayong panglawas

Ang maayong panglawas importante kaayo alang sa kalipay sa panimalay ug sa mga anak. Buot gayud nimo nga ang imong mga anak mahimsog ug kusganon dili mga luyahon. Dili ikaw gusto nga sila dunay mga depekto sa lawas ug sa panghunahuna nga madawat nila gikan kanimo. Daghang mga nasud nga sa dili pa ka maminyo ila una ikawng usisahon kon maayo ba ikaw ug lawas o dili ba. Gihimo nila kini aron sa pagpanalipod sa imong mga anak.

Wala kini magkahulogan nga ikaw adunay hingpit nga kahimsog. Adunay mga tawo nga dunay mga depekto nga nakakat-on sa pagbuntog niini ug nahimong maayong mga bana, mga asawa ug mga ginikanan. Ang mahimsog ug panglawas dili kaayo labing importante apan kinahanglan nga hatagan kini ug pagtagad. Pangutan-a ang imong kaugalingon, mahimo ba siyang maayong inahan sa akong mga anak? Mahimo ba siyang maayong amahan sa akong mga anak? Hinoon, ang usa ka tawo dili gayud mamili ug usa ka babaye o lalaki nga iyang minyoan nga wala pa moabut sa hustong edad ug ang lawas dili pa andam sa kaminyoon.

Buhata Kini

20. Nganong importante man ang kahimsog sa lawas ug sa hunahuna sa imong umaabut nga kapikas sa kinabuhi?

KAHIGAYONAN

Atong gihisgutan nga ang Dios maggiya kanato pinaagi sa mga kahigayonan. Ato kining makita sa mga matahum nga mga sugilanon sa gugma diha sa Biblia.

Gibiyaan ni Ruth ang iyang panimalay ug puluyanan aron sa pag-alagad sa matuod nga Dios. Miadto siya sa uma aron manghagdaw ug “nahitabo” nga didto siya makaadto sa umahan ni Boaz. Ang Dios nagagiya kaniya. Sa dihang nagkita sila ni Boaz, nakita ni Boaz diha kaniya ang kalidad sa babaye nga gusto niyang pangasaw-on. Dihay daghang mga babag sa ilang kamin-yoon, apan ang Dios nagapahiluna kanila. Ang tanan mitabang ug sila nagkadayon.

Usa sa mga kahigayonan nga gigamit sa Dios sa pagiya ni Ruth mao ang tambag sa mga tawong gulang nga may dakung kasinatian. Iyang gitahud ang tambag ni Naomi ug gibuhat kini. Kasagaran ang Dios magagamit sa mga tambag sa mga ginikanan, mga pastor ug mga Kristohanon nga gulang-gulang na sa pagtabang sa mga batan-on sa pagpahibalo sa kabubut-on sa Dios.

Ang sugilanon ni Isaac ug ni Rebeca lahi kaayo kay sa kang Boaz ug ni Ruth. Wala sila magkakita hangtud nga si Rebeca miabut sa ilang adlaw sa kasal. Si Abraham nagasugo sa iyang sulogoon sa pagpangita ug asawa alang sa iyang anak nga si Isaac. Ang sulogoon nag-ampo ngadto sa Dios nga siya pagagiyahan ug ato usab nga maseguro nga si Abraham ug si Isaac nag-ampo usab.

Ang Dios mitubag sa ilang pag-ampo ug nagdala kang Rebeca sa dapit diin ang sulogoon nagaampo. Sa dihang giilaila na sa sulogoon si Rebeca ug ang iyang panimalay, nakita niya nga ang babaye nagbaton sa mga kalidad nga makapahimo kaniyang maayong asawa ni Isaac. Ang tibuok banay nasayud nga ang Dios maoy nagapahiluna niini, busa sila misugot nga mahimo siyang asawa ni Isaac. Ila siyang gipangutana kon mouban ba siya sa sulogoon aron mahimong asawa ni Isaac ug siya misugot. Human sa hataas nga panaw, nagkakita sila. Nagkahinigugmaay sila ug nakabaton sila ug usa ka malipayong panimalay.

Niadtong mga panimalay diin ang ginikanan maoy mamili ug mga pangasaw-onon sa ilang mga anak kinahanglang mag-ampo ug mangamuyo gayud sila sa Dios sa pagiya kanila. Ang maong Dios nga nagadala kanila sa kahigayonan ug nagadala ni Isaac ug ni Rebeca aron magkatipon, mao ra gihapon nga Dios nga motubag sa pag-ampo karon.

Buhata Kini

21. Nganli ang duha ka magtiayon sa Biblia nga gidala sa Dios nga magkadayon pinaagi sa mga kahigayonan.

PAGHIGUGMAAY UG PAG-UYONAY

Walay kaminyoon nga magmalipayon kon walay matuod nga gugma sa bana ug sa asawa. Ang matuod nga gugma nagahatag ug pagbati nga ang duha ka binuhat masigkapikas sa usag usa. Makapahimo kini kanila sa pagbuhat sa pagpahimuot sa usag usa, ug makatabang kanila nga maghiuyonay sa mga butang. Ang gugma maoy nagabugkos kanila labaw pa sa ubang butang.

Ang gugma labaw pa sa kaibug tungod kay kini nagalakip sa pagtahud, kadunggan, ug sa kinasingsing nga pagdawat ug pagkamanggihunahunaon ngadto sa uban. Ayawg saypa nga ang kaibug mao ang gugma. Kon wala ikaw makaseguro sa imong gibati, iampo kini. Pakigsulti sa imong ginikanan o sa ubang hamtong nga Kristohanon mahitungod niini.

Unsa kaha kon ang kaminyoon gipahiluna nang daan sa mga ginikanan sama sa kang Rebeca ug ni Isaac? Wala gayuy halalum ug matuod nga gugma sa wala pa ang higayon nga sila magkainilhanay. Ang gugma maugmad, ug kinahanglang ugmaron. Ang Dios nga mao ang tuburan sa tanang matuod nga gugma, magahatag kanimo ug gugma alang sa tawo nga iyang ihatag kanimo, ug ihatag gayud niya kining tawhana kanimo.

Hinoon, kita nagahisgot sa kaminyoon sumala sa sumbanan sa Dios. Kon ikaw usa ka Kristohanon, ayaw gayud pagdawat sa usa nga dili Kristohanon bisan pag naibog ikaw kaniya.

Genesis 24:58, 67. Ug ilang gitawag si Rebeca, ug miingon kaniya, Mouban ba ikaw niining tawhana? Ug siya mitubag, Mouban ako. Ug si Isaac mikuha kang Rebeca ug siya nahimo niyang asawa ug iya siyang gihigugma.

Buhata Kini

22. Unsay mga kalidad sa gugma nga maoy patukoranan sa kaminyoon?

Kon ikaw naghunahuna sa pagminyo sa usa ka tawo, susiha ang imong pagbati sa imong nasulat sa itaas. Mao ba kini ang imong pagbati? Mao ba kaha usab kini ang pagbati sa imong pagaminyoan?


23. Pag-ampo nga dili ikaw malimbongan sa kaibug nga dili gugmang matuod. Pangayoa sa Dios nga ikaw pagahatagan ug tawo nga imong pagahigugmaon ug minyoan.
24. Pag-ampo alang sa imong mga higala nga nagkinahanglan ug dugang pang gugma sa ilang panimalay.

KASEGUROHAN SA KABUBUT-ON SA DIOS

Ang pagiya sa Dios dili kanunay magagikan sa usa ka tinuyong pinadayag, kondili sa panag-uban sa mga paagi nga gihisgutan na: Ang sumbanan sa Biblia, ang hustong kalidad, kahigayonan, paghigugmaay, ug ang kasegurohan sa kabubut-on sa Dios.

Kining kasegurohan moabut ingon sa usa ka pagbati sa kalinaw mahitungod sa butang nga imong ginaampo, usa ka halalum nga pagtuo nga kini kabubut-on sa Dios. Dili kay ang usa nay makabaton niini, kondili ang lalake ug ang babaye kinahanglan gayud nga mag-ampo, aron sila gayung duha ang, maka baton niining kasegurohan.

Tingali ang pagmando sa Dios mokabat ug hataas nga panahon. Ang kasegurohan tingali moabut sa wala pa o humana ba hinoon Siya magdala kanato sa laing dalan. Kaha mas dali kining moabut kanimo kay sa uban. Ayaw lamang pag-apura. Sulayi ang imong pagbati pinaagi sa mga paagi nga gigamit sa Dios sa pagiya kanimo.



Ayaw kabalaka kon dili ikaw makakita sa tawo nga duna sa tanan nga kalidad nga imong gipangita. Aduna usab tingali ikaw mga punto nga wala sa listahan sa uban. Kinsa kadtong magahimo ug pagpili, kinahanglan mangita siya sa mga kalidad nga labing importante sa usa ka malipayong panimalay. Sa pagkakaran, imo nang kalingawan ug ugmad usab ang imong kinaiya ug kalidad.

Hinaut nga ang Dios magpanalangin kanimo ug magamando kanimo sa dalan nga nakita niyang labing maayo sa tawo nga iyang gipili alang kanimo.

Buhata Kini

25. Hulagwaya ang kasegurohan sa kabubut-on sa Dios.

26. Susiha ug itandi ang imong mga tubag sa tubag nga makita sa sunod pahina.

27. Sulati ang imong rekord sa estudyante nga makita sa luyo sa basahon alang sa leksyon 3.

Mga Tubag sa Leksyon 3

Kon ikaw adunay 8 ngadto sa 9 ka hustong tubag butangi ang imong papel ug labing maayo; 7, maayo; 6, kasarangan. Kon ang imong hustong tubag mokubos sa 6, basaha pag-usab ang leksyon.

1. Tungod sa inpluwensia sa imong kauban nga imong mabatonan sa imong kina-buhi. Tungod kay ang pagpili nagka-hulogan sa tibuok nga kinabuhi.
2. Pinaagi sa Pulong sa Dios.
3. Pag-ampo ug hangyoa ang Dios sa pa-giya kanimò.
5. Samson ug Solomon.
11. Kaanyag, ug edukasyon.
20. Alang sa kalipay sa panimalay ug tungod sa mga anak.
21. Boaz ug si Ruth, Isaac ug si Rebeca.
22. Pagtahud, kadungganan, kinasing-kasing nga pagdawat, ug pagkamanggi-hunahunaon sa uban.
25. Pagbati sa kalinaw ug pagtuo nga kini kabubut-on sa Dios.

Pila ang imong hustong tubag? _____

Grado? _____